



ADDA BILISUMMAA OROMOO

OROMO LIBERATION FRONT

Haala Yeroo fi Cehumsa Itophiyaaf Jedhamu Ilaalchisee Ejjeennoo ABO

Guraandhala 14, 2018

Yeroo ammaa, ummatni Oromoo gita bittuu alagaa fi seerasheen hin bullu, walabummaa fi bilisummaa mulqamne ni deebifatna, waamicha idilee jedhu ifatti dabarfatee argama. Qabsoon kunis erga eegale waggoota afuriif osoo walirraa hin citin wal dura duuba deemsifamama akka jiru hubatamaa dha. Yeroon xumurri itti godhama jedhamee eegamus ammaaf mirkanii miti. Kana waliinis wal qabatee, qabsoon Oromoon tokkummaan adeemsisaa jiru kun mooraa diinaa keessatti sodaa guddaa uumee jira. Diinnis sodaa kana irraa kan ka'een tarkaanfii gaddisiisaa fi dhala nama irratti fudhatamuu hin qabne saba Oromoo irratti fudhachaa jira. Hundi kun ta'uuyuu ummatni Oromoo gaaffii bilisummaa dhugoomsuu cimsee itti fufeera. Haa ta'u malee, yeroo murtaa'ee as, akeeka qabsoo Oromoo irratti ololli adeemsifama akka jiru ni dhaga'ama. Warreen tokko tokko mootummaa cehumsaa jedhanii waamicha yeroo godhan mul'atu. Cehumsi kunis mootummaa Wayyaanee ummata keenya lafarraa haxaawaa turee fi ammas itti jiru akka dabalatu akeeka. Lafa irratti garuu, sochiin Oromoon taasisaa jiruu fi ifatti mul'atu gaaffii abba biyyummaa Oromoo dhugoomsu akka ta'e agarsiisa.

Oromiyaan humnaan booji'amte, humnaan is bulfamaa jirti. Dhugaa askii jiru irraa ka'uun Addi Bilisummaa Oromoo (ABO) ijaaramee ummata Oromoo tokkoomsuun walabummaa Oromiyaaf akka falmatu taasise. Haalli amma Oromiyaa keessatti warraqsaa finiinse kunis isuma waggoota afurtammaf ABO irratti qabsawaa fi qabsoofsisaa jiru waliin tokkuma. Wayyaaneen human weerartuu dha. Oromiyaa gadi lakkifitee deemuu qabdi.

Gabaabatti, Wayyaaneen bara 1991 irraa eegaltee ummata Oromoo ajjeesaa, hidhaa fi gidiraa agarsiisaa akka jirtu hubatamaa dha. Jaarmoleen Mirga Namoomaa akka baasanitti waggoota sadan darban keessatti Oromoota 4000 (kuma afur) oltu humna ayyisan Wayyaaneen ajjeefaman. Guraandhala 10, bara 2018, Ittisni Waraana Wayyaanee qubsuma Hamaareessaa qubatan irratti dhukaasa banuun Oromoota 11 yeroo ajjeesan, hedduus madeessaniiru. Ji'oota lamaan dura, Muddee 10, 2017 Ittisumti Wayyaanee kun ummata nagaa dhukaasa itti banuun Oromoota 15 galafataniiru. Bifuma kanaan ummata naanoo Waldiyaa jedhamu, bulchiinsa Amaaratti, nagaan ayyaana ayyaneffatu irratti dhukaasa banuun namoota 7 ajjeesaniiru.

Ajjechaan Hamaareessa irratti raawwatme qaamuma duguggaa sanyi Oromiyaa mara keessatti deemsifamaa jiruu fi Oromoo milyoona tokkotti tilmaamamu irratti, naannoon mootummaa Somalee ta'e jedhe, qe'ee fi qabeenya qabu irraa akka buqqa'u yakka hojjetameedha. Haalli humnaan buqqisuu kun ji'a Muddee, bara 2017 irraa eegalee itti fufee jira. Duulli akkasii kun kan inni xiyyeeefates bahaa fi kibba-bahaa Oromiyaa, naannoo Somaalee Itoophiyaa fi naannoo bulchiinsa Somalee waliin bakka wal daangessu irratti. Yakkii akkasii akka raawwatamus hogganaa fi tumsa barbachisuu kan Polisiin Addaa naannoo Somaleef kennu, hidhachiise ummata Oromoo mesha-maleeyyi irratti bobbasu, qondaaloota mootumma Wayyaaneen durfamuu dha. Polisiin Addaa naannoo Somalee kanas kan leenjisu qondaaloota Wayyaanee ti. Miidhamtootni naannoo Somalee buqqa'an 4800 (kuma afuriif dhibbi sadeet) qubsuma Hamaareessa keessa turan. Bakkuma kanatti dhukaasa Ittisa Wayyaaneen itti banameen lubbu yeroo buqqa'an ammbifatan dhabaniiru.

Yaakka dhala namaa irratti Wayyaaneen yeroo dheeraaf rawwataa jirtu as irratti ibsuun ni cima. Mootummaan wayyaanee mirgaa fi lubbuu dhala namaaf dantaa akka hin qabne yeroo danuu mul'ateera. Akka fakeenyatti, da'ima wagga sagalii harkasaa qaxamursee, bilisummaa fi haqaaf dhaabate dhukaasanii ajjeesaniiru. Akkasumas haadha mucaashee ambifachuuf harka lama ol kaafte kadhatu rasaasaan ajjeesaniiru. Haadha ilmishaa jalaa ajjeefameef reenfasaa bira teessee boossu, akka reenfasa irra teessuu dirqisisaniiru. Miidha qaamaa fi sammu ishee irraan ga'aniiru. Kun waraannii fi mootummaan Wayyaanee mirga dhala namaaf akka dhimma hin qabne agarsiisa. Mootummaan kun karaa siyaasaas ta'e haamileen ummata bulchuuf madaala hin guutu. Bifa kamiinuu mootummaan Wayyaanee haaromsaaf dhichuus hin qabu. Oromiyaan mootummaa ajjechaa fi hidhatti amanu akkasi irraa bilisa ta'uu qabdi. Mootummaa cehumsa Wayyaaneen dabalate, akkasumas deggarsa humnoota alaa fi kan jaarmayoota siyaasa Oromoo tokko tokko dabalatee, adeemsifamaa jiru kan akeeku, qabsoon wareegama ol aanaan asi ga'e, akka qancaruu taasisu bira darbee, ummata Oromoo mootummaa Wayyaanee jilbeenfachise dura dhaabbachuun diinaaf karra saaquu ta'ee argama.

Kanneen haaromsa mootummaa Wayyaanee waliin fedhan wanti guddaan dagatan aangoon jilmaan qabamu isa hirranfachu dha. Wayyaaneeen furtuu aangoo ta'an kan akka seera-raggaafuu, murteessituu fi dinagdee dhunfate jirti. Caasaa fi jaarmayaa mootummaa kam irrattuu to'annoo guutuu qabdi. Isaanis, ittisa, ayyisa, tika, humna poolisii fi dhimma dantaa alaa yeroo ta'an caasalee kanatti gargaaramuun sadarkaa biyyoolessaatti haalli wal-qixa hin taane akka raawwatamu taasifti. Kana malees, miidiyaa fi tajaajila internet irratti ol'antummaa guddaa qabdi.

Mootummaan kun mortmittota bebbeekamoo tokko tokko caasaa mootummaa Wayyaaneeen hoggantu keessa galchuu ni mala. Sun garuu, gaaffii bilisummaa hin dhugoomsu. Haalli bifa akkasiin qindaa'ee kun mootummaan nama nyaataa fi abba hirree ta'e aango irra tursuu qofaaf tumsa. Kana jechuun ummata Oromoo ajjessuun itti fufa jechuu ta'a. Qabeenyaan billiyoonaan lakkawamu humnaan, akkasumas kara seeraan ala karaa ta'een ummata Oromiyaa jalaa saamamee baankii biyya alatti kuufamuun itti haa fufuu jechuu ta'a.

Karaa biraa ammoo, haala haaromsaa kan qindeessuu fi hojiitti hiikuuf yaaluun yakka waagoota digdamii torbaaf (27) ummata Oromoo fi ummatoota biroo Itoophiyaa keessa jiran irratti mootummaan Wayyaanee fi miiltooleen isaanii raawwatan tumsuu dha. Jarreen kun akka duuguggaa sanyiiif, yakka waraanni raawwateef, akkasumas yaakka namooma irratti rawwataniif hin gaafatamne taasisuu dha. Sirni qabeenya amma jiru, Wayyaaneeen hogganamu akka itti fufu ayyamuun, deegartootaa fi miltooleen isaanii akka deebisanii ummata cuunqurfame humnaan bitan ayyamuu dha. Bitaa deebisanii ofirra kaa'uu dha. Finfinneetti Wayyaanee waliin aangoo hirachuuf figuun, isumayyuu mootummaa dhiigaa ummata laaqamee jiru waliin hojjechuuf murteessuun hiikkaa bilisummaa fi haqaaf ummatni keenya qabaachuu qabu dura dhaabbachuu dha. Bilisummaasaa gufachiisuu ta'a. Lafa irratti qabsoon ummata deemsifamaa jiru garu kan akeeku sirna Wayyaanee fi caasalee isheen ijaarte hundeera buqqisuu dha.

Wayyaanee fi miiltooleen ishee sirna siyaasaa, dinagdee fi ittisaa amma qabdu itti fufiinsaan to'achu irraa boodatti hin jettu. Kan isaan aangoo fi Finfinnee keesaa haxaa'ee baas'u humna ga'eessa ta'e qofaa dha. Kun akka hin taane, "haaromsa gadfagoo" maqaa jedhuun olola dogoggorsaa fudhatte ummatatti gad baate. Olola kana oofufis miiltoolee fi deggartoota keessaa fi alaan bitattee bobbaftee jirti. Kan nama ajja'ibsiisu jaarmooleen bilisummaa Oromiyaaf falman tokko tokko olola Wayyaaneeen bifa dhoksaan deemsiftu kana akka waan bilisummaa dhugaa fi dimookrasii argamsiisuutti fudhachuu isaaniiti. Dimokrasii hanga Wayyaaneeen aangoorraa rukuttaan hin buuneetti hin yaalamu. Hin jirus. Bakka kun hin jirretti qabsoon lammummaa bakka ga'uu hin danda'u. Diimookrasii yeroo gabaabaa keessatti biyya Itoophiyaa keessatti argamuu hin danda'u. Kana arguuf Wayyaaneeen gutummaatti buqqa'uu qabdi. Bilisummaan, haqni, walqixumman, mirgi namommaa fi kan dhuunfaa karaa amma haaromsa mootummaa jedhamee, isumayyuu sirna nama nyaata Wayyaanee dabalatee mirkanaa'uu hin danda'u. Kanaafuu, ABOOn sirna haromsaa Wayyaanee dabalatee adeemsifamu kana ni balaleefata.

Daandiin qabsoo bilisummaa Oromoo yeroo ammaa deema jiru kan tooftaalee adda addaa keessaa ABOOn filataman miti. Bilisummaa Oromoo diina mo'achuun dhugoomsuuf falli hundumtu baroota darban keessa yaalaman turan, hin milkoofta male. Har'a qabsoon dhaloota qubeen, Qeerroo jedhamee beekamuu dhiiraa fi dhalaa osoo hin jedhin haala nama boonsuun furguggaa'aa jira. Qabsoon Oromoo sochii Oromiyaa mara keessatti deemsifamu ta'eera. Qabsoo moo'achuuf deema jiruu dha. Kana ifatti argaa jirra, wabiis ba'aa jirra. Amma kan nurraa cegamu haala sochii kana bifa hundaan jajabeessuu, bifa dhuunfaa fi walootiin finiinsuun galmaan ga'u dha.

Nuti gama keenyaan ABOOn duraan dursa Oromiyaan tartiiba yeroo cheumsaa kan mata ishee qabaachu qabdi jennee waamicha dhiheesina. Waamichi akkasii kun ammoo, yoo xiqqate sagantaa ummata Oromoo wayyaba naannoo siyaasaa fi jaarmayaa hawaasaa keessatti tokkoomsu dha. Nuti duraan dursinee Oromiyaa walii galte arguu feena. Walii galteen akkasii kun buu'uura waloo fi ejjatnoo hawaasa adduunyaa maratti dhi'eeffatnu, balaa Itoophiyaa keessatti nu irratti raawwatamaa jiru ibsu, ammallee balaa nu irratti agamame jirurraa kan nu baraaru ta'uu qaba.

Qabsoon ummatni Oromoo taasisaa jiru mirgi isaa osoo hin sharafamin hiree murteeffanaan ga'uu dha. Akka jaarmayaa bilisummaaf falmuutti kaayyoon kenya inni duraa diina biyya keenya humnaan dhuunfate buqqisuu dha. Inni lammataa, hakuuccaa fi sammicha ummata keenya irratti raawwatamaa turee fi jiru dhaabuu dha. Akeekni keenya Oromiyaa humna gita bittuu jalaa baasuu dha. Akeeka keenya isa duraa erga xurratnee booda hojiin lammaffan ummata Oromoof mootummaa of danda'ee fi birmaduu ta'e ijaaruu dha.

Oromiyaan Ni Bilisoomti!

Adda Bilisummaa Oromoo